

**■ TRIBUNA POLITICA**

# Abitar en la vegliadetgna

DA CHRISTIAN RATHGEB,  
CUSSEGLIER GUVERNATIV

**T**enor in studi da la Federaziun svizra da spitex vivan passa 80 perschent da las personas sur 80 onns en l'atgna abitaziun u en l'atgna chasa. Dus terzs da questas personas vivan sulets, in terz cun ina partenaria u in partenari. Star a chasa fin en l'auta vegliadetgna, fin a la mort, è il giavisch da la gronda part dals umans. Quest giavisch è chapavel, premetta però savens er ch'i vegnian tschentads a temp ils binaris e ch'i vegnian prendidas decisiuns per midadas.

**U**ltra da dumondas davart l'abitar sco tal èn decisivas er dumondas davart la mobilitad e davart l'access a contacts socials sco er a servetschs per che personas attempadas possian restar a chasa. Abitaziuns e chasas pli veglias n'èn betg adina construidas u endrizzadas uschia che personas pli veglias che dovran eventualmain tgira u assistenza pon restar là. Posts spezialisads e posts da cussegliaziun gidan en cas ch'igl è da far adattaziuns architectonicas per obtegnair abitaziuns privatas u chasas privatas senza obstachels.



**S**che las atgnas resursas u quellas dals conturns na bastan betg pli per la tgira e per l'assistenza a chasa pon servetschs da spitex permetter d'abitar a chasa, e quai furnind prestaziuns da tgira, d'assistenza e da tegnairchasa ch'èn confermas als basegns.

**P**er personas attempadas e per personas che dovran tgira datti en il chantun Grischun ina buna purschida staziunara da tgira. Er posseda il chantun ina rait bain equipada da servetschs da la tgira ed assistenza a chasa. In basegn d'agir exista però tar las furmas d'abitar alternativas, sco en spezial tar l'abitar assistì. Personas attempadas che na pon betg pli viver a chasa malgrà lur pitschen basegn da tgira n'han oz – almain sch'ellas vivan en relaziuns economicas modestas – savens nagina alternativa

che quella d'entrar en ina chasa da tgira.

**C**un il model directiv pertutgant la vegliadetgna dal Grischun 2012 ha il chantun fatg frunt a las sfidas da la midada sociala e demografica. Tenor il model directiv duain vegnir messas a disposiziun, ultra da las structures da provediment existentas, pli e pli purschidas alternativas da tgira e d'assistenza per personas attempadas, che las duain permetter da viver uschè independentmain sco pussavel en las «atgnas» quatter paraids. Abitar assistì cumbinescha abitaziuns da locaziun senza obstachels cun servetschs da sustegn e da tgira che las locatarias ed ils locataris pon pretender tenor lur basegn individual.

**I**l sboz da la lescha ch'è vegnì dà en consultaziun l'atun passà tras il departament prevesa, per metter in abitar assistì er a personas attempadas basegnusas, che la taxa da di per il servetsch da pichet da l'assistenza e ch'ills custs supplementars da l'abitaziun conferma a la vegliadetgna vegnian indemnissads en cas da basegn tras prestaziuns supplementaras. Il departament è actualmain vidlonder da preparar la missiva correspondentia.